



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10

Temang nung tashidak alirtem home quarantine masütsüla

French Open 2021: Zverev pezübuba round-i iogo



VOL. XVIII NO. 231 (ADOK 231) DIMAPUR

KÜPTOKNÜ (SATURDAY)

AAMI (JUNE) 05, 2021

₹ 5.00

## Medziphema nung Covid Care Center lapok

**Dimapur, June 4, 2021 (TYO):** Dimapur district nung Covid-19 atema Nodal Officer, Y. Kikheto Sema, IAS-i Hokolbarnü Community Health Center, Medziphema nung Covid Care Center lapoktsüogo.

Iba sentong nung Kikheto-i Medziphema nung health workers aser public ayongzüka jembidang tasü aittsü aser longjemer Corona madak takok ngua inyaktüsü ashi.

"May 17, 2021 nung ni Medziphema semdangdang COVID-19 puteter nisung 86 liasü saka tangbo 348 kümogo. Nisungtemi olulu mangai vaccine agitsüla" ta paisa metetdaksü.

"Tang ya meimchir yaritsü mapang tajung lir anungji yariteptsü mepishir. Külen, frontline workers aser talisa health workers dak tim masüba mapa inyakra ozüing tapet agi

merenshitsu. Medziphema nung aliba health workers aser nübortem longjemer Covid rara nung shilem agitsü ayongzüker. Team Dimapur tashi itta lir aser Tsüingrem temoatsü dena asenoki iba rara madak takok angutsü" ta Kikheto Sema-isa ashi.

CCC, Medziphema nung maparen inyakba atema Kikheto-i anir Team Dimapur-i SMO, CHC Medziphema, Dr.N. Sezo aser telok, administration aser Medziphema sensotem nem tenüngsang agütsü.

"CHC Medziphema nung Covid wara agi matongba mapangtem nunga mapa tajung inyakba atema tenüngsang agütsür. Union Health Secretary-i Joint Secretary ama inyakba mapang 2016 küm Health Center semdangdang kanga tenük sünga liasü.

(Maneni tapak 10 nung...)

## Assam sorkari Covid-19 agi shirangertem anepaluba jenjang latetstsü

**Guwahati, June 4, 2021 (Agencies):** Assam sorkari nija mozü kitem nung Covid-19 agi shirangertem anepaluba indang jenjang latettsüogo.

Nija mozü kitem tapu balala lemsar Covid-19 agi shirangertem anepalutsüba jenjang latetstsü.

"Covid-19 wara agi timtemba mapang mozü ki kari shirangertem dang nungi sen aika agir ta public-i osang sangoktsüba sülen jenjang latetstsü telemteba agi," ta Assam health minister Keshab Mahanta-i ashi.

Super Specialty Hospitals aser tanga hospitals nung COVID agi shirangertem general ward,

paying cabin, aser ICU (with & without ventilator support) nung amongba nung ajemdaker sorkari sen agitsü latetstsüba.

Super specialty hospital ka nung anogo ka nung yamai agitsü. General ward Rs 5,000, share cabin Rs 6,500, ventilator medeni ICU Rs 10,000 aser ventilator dena ICU Rs 15,000.

General hospital ka nung amongertemi anogo ka atema yamai agütsüsü. General ward-Rs 4,000, Share cabin - Rs 5,000, ventilator medeni ICU - Rs 9,000 aser ventilator dena ICU - Rs 12,000.

(Maneni tapak 10 nung...)

## Er. Kevisekho Kruse mang ayimer

**Dimapur, June 4, 2021 (TYO):** 8th Western Angami Assembly nungi taoba NDPP candidate Er. Kevisekho Kruse June 4, 2021 nung asüba osang angashia kanga aoksar aser temolung raksar, ta NDPP President Chingwang Konyak-i metetdaksü.

Nationalist Democratic Progressive Party (NDPP) züngsem ajaki Mrs. Salhutono Kruse aser asür kinungertem den mangyimba osang lemsateper, ta pai ashi.

Er. Kruse-i mapang talangka sorkar tenzüka aruba sülen 2018 küm NDPP tenüing nungi tokteptsü telemteba agia liasü. Iba election nung pai takok mengutetaka, pai par

constituency nung alirtem nangzüka ama yaria aruogo. Pai constituency aser State level nung shilem tajung agia aruogo, ta Chingwang Konyak-isa ashi.

Maneni, Angami Gazetted Officers Krotho (AGOK), Western Angami Youth Organisation (WAYO), ANPSA Dimapur Unit aser Minister Neiba Kronu nungertemia sangdong balala ajanga Er. Kevisekho Kruse asüba atema mangyimba metetdaksüogo.

Er. Kevisekho Kruse ya Chief Engineer PHED, Government of Nagaland inyak aser pa ya North Town Hr. Sec. School Chumukedima, Dimapur Proprietor & Chairman liasü.

## Covid puteter temi mapang shitak nung medical teyari mebushiba ajanga taküm samar

**Kohima, June 4, 2021 (TYO):** Nagaland nung COVID-19 puteta alir aika asüba atema tebilemstsü abener aser iba ya menur ang medical teyari bushiba ajanga lir, ta Health & Family Welfare (HFW) Department-i tanü metetdaksü.

Nagaland nung Covid atongba sülen May 25, 2020 nungi tenzüker tanü tashi nung COVID-19 puteta alir nisung 416 süogo. Iba nungi nisung 14 tashi tanga tashidak ajanga asü.

"Shiranger aikati kanga menur ang medical teyari bushiba ajanga taküm samar. Ano nisung karibo parnok dak COVID-19 alibaji magizüker. Tanü Zunheboto nung COVID-19 puteta aliba shiranger kati pa positive masü ta shia mozü kidang amongstsü memolungba agi par kinungertemi Dimapur-i anir aodang len tom nung asü" ta Integrated Disease Surveillance Project atema State Nodal Officer, Dr Nyanthung Kikon-i ashi.

"COVID-19 puteta alirtem asüba otsü bushitepa ora, parnok timba kati shirangaka medical teyari mebushiba ngutetogo. Parnoki mozüba agi saka mapang shitak nung medical teyari mebushiba ajanga taküm sama" ta Dr Kikon-isa ashi.

### YIMTSÜNGTEMNUNG COVID-19 KANGA PUTEETER:

COVID wara tanabuba atongba sülen Health & Family Welfare Minister, S Pangnyu Phom-i mezüing atema tanü osangbener den jembidang "asenok yimtsüing kar nung Covid putetba osang angashia shisabulur" ta ashi.

Iba atema department-i yimtsüingtem nung COVID-19 azüoktsü atema standard operating procedures (SOPs) metetdaksüogo. State War Room, District Task Forces aser Village Task Forces-i ajak dang nungi teyari agia mapa inyakdar, ta pai ashi.

"Covid nungi jenbua alitsü atema vaccine agitsüba ya kanga tongtipang anungji yimtsüingtem nung Covishield vaccine agütsüba mapa tuluba inyaktüsü. Onoki DTFs dang yimtsüingtem nung vaccinations sites shimtsü tetuyuba agütsüogo. Ano, külen mangateter temi taila video aser olulutem proskhir" ta Minister Pangnyu-i metetdaksü.

"Nagaland nung jilatem dang nungi yimtsüingtem nung COVID-19 kanga puteter. Yimtsüingtem nung mapa inyaker nübo peria dang lir aser iba ya azüoktsü imlar" ta H&FW Principal Secretary, Amardeep S.

Bhatia-ia ashi.

"Nagaland nung lockdown aser tenokdangba balala ajanga virus menatepba azüoktsü imlar" ta paisa ashi.

### DOCTOR TEMPERIADANGLIR:

Nagaland nung doctor 540 den timba lir aser NHM-ia contract inyakyim nung doctor 88 shima mapa inyakdar. Iba dak alia private sector nungi doctor temi COVID-19 atema inyakdar, ta Bhatia-isa ashi.

"Nagaland nung doctor mali aser mapa tazüingtem adok nunga nübo malitsü. Tawa tu NHM-i specialist posts 28 aser JDMOs 15 shimtsü atema osang sangoktsü saka JDMOs 15 aser specialists 4 nungi dang applications angu" ta paisa metetdaksü.

"Department-i doctor tem pei mapa lemsükdak maliba atema süoki ia bilemer. Onoki district ajak nung CMOs aser MOs dang osang shitak agütsüsü shiogo aser ketdangsur kari danga mapa shitak meinyakba metetra, ozüing tapet agi merenshitsu" ta HFW Principal Director, Dr Neikhrilie Khimiao-ia ashi.

Department-i doctor aika shimokogo aser NHM ajanga yimtsüingtem o centre balala nung inyaktüsü atema doctor talila shima lir, ta Dr Khimiao-isa ashi.

(Maneni tapak 10 nung...)

## COVID-19 Nagaland: Puteter temi dang nungi taneptsü angur timba

**Kohima, June 4, 2021 (TYO):** Hokolbarnü Nagaland nung COVID-19 puteter dang nungibo taneptsü angur timba liasü. Tanü COVID-19 puteta alir nisung 148 taneptsü angu aser 147 dak putet.

"Tanü nisung 147 dak COVID-19 putet. Parnokji Dimapur nung 53, Kohima nung 47, Tuensang nung 19, Mon nung 10, Phek o Zunheboto nung pungugu (5), Mokokchung nung 4, Longleng nung 2 aser Peren o Wokha nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tanü nisung 148 taneptsü angu. Parnokji Dimapur nung 75, Kohima nung 24, Mokokchung nung 18, Zunheboto nung 17, Phek nung 8, Wokha nung 4 aser Mon o Peren nung kaka (1) lir" ta paisa ashi.

Nisung 22,387 dak COVID-

19 putetba nungi 16,637 taneptsü nguogo aser tang 4,695 anepaludar. Yashi tashi Nagaland nung COVID-19 nungi taneptsü angur 74.24% aliba tanü 74.32% kümogo, ta Dr Kikon-isa metetdaksü.

Tang anepalurtem rongnung nisung 190 dak shirangba yimya terara lir, 80 tera shiranga oxygen agir, 29 kanga shiranga oxygen agir, 18 ventilator medeni ICU nung aser 9 ventilator dena anepaludar. Nisung 4,370 dakbo shirangba yimya kecha mali.

"Hokolbarnü COVID-19 puteta alir nisung 12 asüba züingsema tasür ajak agi 416 kümogo. Tanü asürtemji Kohima nung 5, Dimapur nung 3, Mokokchung nung 2 aser Mon o Zunheboto nung kaka (1) lir" ta Dr Nyanthung Kikon-i metetdaksü.

Nagaland nung COVID-19 puteter nisung 639 tashi tanga

state temi ogo, ta paisa shisem.

COVID-19 alitsü akok ta temolung melemba sample 1,97,054 tendangogo. RT-PCR ajanga 90,744, TrueNat ajanga 56,566 aser Rapid Antigen Test ajanga 49,744 tendang.

"Brihostibar tashi nung Nagaland nung nisung 2,31,601 nem COVID-19 vaccine indang dose 2,85,821 agütsüogo" ta State Immunization Officer Dr Ritu Thurr-ia ashi.

Vaccine agirtemji frontline workers 58,808, healthcare workers 15,577, arishi küm 45 ser temapur 1,23,722 aser arishi küm 18 aser 44 tsüingda alir 31,502 lir.

"Vaccine agirtem rongnung nisung 54,212-i dose anaprong agiogo. Parnokji frontline workers 28,014, healthcare workers 10,195 aser arishi küm 45 ser temapur 16,003 lir" ta Dr Thurr-isa metetdaksü.

## Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aittsüsa kichiba (window & ventilation) lapoka yuang. Akok tashi süngjanglijang aser süngolemba agi tua chiyongtsü tajung chiang aser tzü aser juice jemang. Pei meyong mobile phone, kumesü aser toothbrush nunger ama melentepa tamshi. Mozü achitsü agüja lira, aji shitak chiang. Tango junga mesashitba, teku ashiba, aketba aser temang metaba timtem lira yakta doctor bushiang.



Tir Yimiyim

## M-WhatsApp tembartemi Old Age Home nem teyari agütsü



**Kohima, Aami/June 04 (TYO):** COVID-19 tashidak wara agi tesem ajunga sünger aliba mapang lenla balala nungi social media group ka nung tembartemi Kohima district kübok Meriema nung aliba Old Age Home nem teyari agüja liasü.

M-WhatsApp Group nung medemertemi tashidak wara asoshi süoki ia bilemja temolungertemi sen lakh 1.15

bendena teintet rogo 25 aliba Old Age Home nem tenla agütsü.

M-WhatsApp Group nungi züngsem pezüi sen lakh ka den sen 15,000 jenjang tongtipang osettem bener arua Old Age Home kibur, Neithonuo T. Leigise nem June 4, 2021 nü amoktsü.

K Elu Nandang-i ashiba agi, state sorkari iba Old Age Home nung alir nem tesüiba

küm ana teyari magütsür ta angazükba osang ka iba WhatsApp group nung züngsem kati lemsatepa liasü.

Parnoki bendenba sen amoktsüba den külemi state sorkar aser Health and Family Welfare Department dang teintet rogotem nem tang tashidak wara agi tesem ajunga sünger timtema aliba mapang teyari agütsütsü ajangshia liasü.

## Kohima DTF ajanga nüburtem ayongzüker

**Dimapur, Aami/June 04 (TYO):** Kohima District Task Force (DTF) on COVID-19 tenüing nung Deputy Commissioner & Chairman DTF Kohima, Gregory Thejawelie NCS ajanga June 3, 2021 nü nüburtem ayongzüka sangdong ka agütsü.

Sangdong ajanga ashiba agi, healthcare nung inyaker, frontline nung inyaker, yimtsüing aser ward ketdangsür, lokti tentet balala, NGOs, tamangba yimsü tsütsü telok balala, shisaliok tentet, SHGs, yimtenren aser temolunger telok aser kija shiai COVID-19 den raraba nung tashi angatepa

shilem balala agiba atema pelar. Team Kohima ajanga iba tashidak den tasü ita raratsü temolungtetba nung lir aser yamaji Kohima nung aliba senso ajaki iba tashidak prokshia aoba ajemdaktsütsü atema shilem agütsü amanger, ta ashi.

Nisung ajaki tazüokba lia Covid tashidak nungi jenbutsi yimyatem amshi nung ang iba tongpang ya akoktsü. Kasa mapang iba tashidak agi menepir alirtem shinga sempa aser mokong-meya mamshitsü imlar, ta sangdong ajanga ashi.

COVID-19 atema hadir tajungtiba temji face mask agiba, lokti mesüra tesem

temesü nungi pila aliba, teka mürekmejuba aser nisung o nisung tsüingta tawa ayuba, mapang shidak nung tendangba aser dangar nungi pila aliba ya alitsü, ta ashi.

Iba tashidak wara tatsüba kumdaktsütsü asoshi lenmang ajak agi mozü agütsüba ya dang lir, anungji temsüa alirtemi mozü ya agütsüla. Tang tashidak wara mapang teyari balala atema Kohima DTF on covid-19 den 24x7 Helpline Number 6033833879/9362705742 m e s ü r a warroomkohima@gmail.com ajanga tongteprateptsü akok, ta kasa sangdong ajangasa ashi.

## NVCO ajanga libajen wazüka ayutsü ayongzüker

**Dimapur, Aami/June 04 (TYO):** World Environment Day nungtem nung Nagaland Voluntary Consumers' Organisation (NVCO) ajanga nüburtem dang asen meketa aliba libajen wazüka ayutsü ayongzüka liasü.

Küm shia World Environment Day ya June 5 nung amunger, aser NVCO-ia hopta tepiyong iba anogomung nungtem nung school college aser arogo balala nung sentongtem ayongzüka agir, saka tang tashidak wara tamajung aliba ajanga taküm sentong balaka ayongzüka magiteter, ta sangdong ka ajanga ashi.

Alima lenirtemi iba anogomung nungtem nung virtual yimya nung UN Decade on Ecosystem Restoration pelashishia agizüka amunger aser iba mapang lenir, activist, nungtugu nisungtemi osang balala sangdongtsü aser kentenba sentong alitsü.

Asen muketa aliba tzü-mopung züba-züyima metoktsütsüla aser akumtsüba agizüktsüla, ta nüburtem nem angatetdakttsütsü nukjidong

nung World Environment Day ya alima ajunga nung amunger, ta NVCO tir aser environment activist Kezhokhoto Savi-i ashi.

Asen libajen wazüka ayutsü nungdak ta nüburtem nem angatetdakttsütsü mapang tonga aruogo, ta pai ashi.

Alima nem teraksa jenti agütsüogo aser anogoshi tali tali raksar. Iba lima ya nü lima aser iba lima ya kü lima lir. Ali ya rongsen tongtipangtiba lir, ta Savi-i ashi.

Loktiliba, rongsenren aser libajen nung ajemdaker NITI Aayog ajanga küm shia asadanga Sustainable Development Goals (SDG) India Index and Dashboard 2020-21 nung Nagaland ya tamajungtiba state aser Union Territory nung dena lir ta angazüka temolung kanga shirangerm ta NVCO ajanga ashi.

Taküm World Environment Day indang omen ya "Ecosystem Restoration" lir, tetetzü libajen yanglushiba mesüra raksar aliba asadanga aser tang tashi nisung meimchiri mokongshie aliba libajen wazüka ayuba alitsü.

Takum shiruru peria aliba libajen ajanga ali temu tali agütsür, süng aser ango tuluba agütsür aser greenhouse hases tuluba riziünga ayur. Libajen yanglushiba nung yimya aika lir, aser itemji süngtong tsünüba, green cities, achi-ajemba yimya melenshiba, ayong aser tzükum mürekba alitsü.

Arem aser süngtong agi asen nem tzü asem mopung temürek agütsür, alima atsükba tangola atsüoker. Ayong aser awatsüing ajanga nisung billion aika nem chiyongtsü, tzü aser tashi agütsür, süngtong-litong aser takum shiruru alitsü tesem agütsür, ta sangdong ajanga ashi.

Terenlok atema asenoki arem mürekba mesüra süngtong tsüingdokba melena asenoki süngtong tasen matemer, koba ajanga alima talemba kumdaktsür, ta Kezhokhoto Savi ajanga ashi.

Ajidang masü tzü agi anüingba asenoki anogoshi ajangshir aser angashir, anungji ayong aser yangji sendaka aliba libajen wazüka ayutsü atema NVCO ajanga ayongzüker, ta pai ashi.

## ICH ajanga angati temang anepalutsü

**Dimapur, Aami/June 04 (TYO):** COVID-19 tashidak wara mapang shirangertemi teyari nungdakba ajiteta aser state sorkar indang Health Care Services khuret onsara bena aliba nung yaritsü mechi Impur Christian Hospital (ICH) nung tang nungi tenzüka temang angati anepalutsü lemtetogo, ta Dr Sashimeren Aier, Chairman of Trustee, ICH aser Rev Dr Mar

Pongener, Executive Secretary, ABAM nati June 3, 2021 nü sangdong ka ajanga ashi.

Registration, consultation aser mozüki taa ajunga angati asütsü.

Mozüki ya Ayushman Bharat kübok zülüoka lir asünungji, card aliba shirangertem asoshi mozü aser temang anepaluba taa ajunga angati asütsü, ta sangdong ajangasa ashi.

## Kiphire SP office shibanga atar

**Dimapur, Aami/June 04 (TYO):** Superintendent of Police Office, Kiphire nung COVID-19 putetba ajanga iba office ya ghonda 48 atema shibangtsür, ta Deputy Commissioner aser DTF Kiphire mendenpuba ajanga June 4, 2021 nü sangdong ka

nung metetdakttsü.

Iba totuyuba nung aibelenba nisung kar danga lira, Disaster Management Act, 2005 indang Section 51 nungi 60 aser IPC indang Section 188 kübok merenshitsü, ta sangdong ajangasa ashi.

## Kohima district kübok yimtsüingtem nung COVID-19 tendanger

**Dimapur, Aami/June 04 (TYO):** Yimdak-yimtsüingtem nung COVID-19 positive cases tali putetba mechi Kohima District Task Force on COVID-19 ajanga totuyuba agütsüba ama Kohima district kübok yimdak-yimtsüingtem nung tapi agi sample bendena tendanger.

Kohima CMO Team aser MO Kezocha den administration aser PS Kezocha ajanga June 03, 2021 nü nü Kezo Town aser Kidima nung tapi agi sample bendena COVID-19 tendangba sentong agia liasü. Iba drive nung jila ana nungi sample 33 bendena liasü. Maneni Tseminyu Sub-

division küboka dokan kibur aser shishilembartem densema jila nung alirtem dak tapi agi tendanga liasü. Tseminyu nung district administration, medical team aser Tseminyu Sub-Divisional Task Force on COVID-19 temi anir iba maparen inyakba mapang sample 107 benden.

Kasa mapang Tesophenyu PHC nung aliba Tseminyu Medical Team ajanga June 4, 2021 nü nisung 30 nem COVID-19 mozü agüja liasü aser item rongnung arishi küm 18 nungi 44 tsüingta nisung 27 aser arishi küm 45 tema nisung asem liasü.

## K.T. Sukhalu-i kaketshir atema tablets sayatsü

**Dimapur, Aami/June 04 (TYO):** Aspirational District Kiphire nung aliba Government School tem nung Class 8-12 nung azünger kaketshir atema Advisor, School Education, K.T. Sukhalu, IAS (Rtd.) ajanga June 3, 2021 nü virtual sentong ka nung tablets sayatsü.

Iba sentong nung jembiba mapang, tashidak wara mechi kaketshir aser tesayurtem asoshi taoba küm ana nung timtem aser tetsükdaktsü jenti ajuruogo, aser lenla kar nung takok anguba osangtem liaka ano aisü nung mera balala agütsü nungdaker, ta ashi.

State kübok meta talang nung aliba tesemtem nung tesendaktep junga maliba indang tebilemstü lemsatepba mapang, tablet yagi kaketshirtem yaritsü, kechiaser tablet nung data connectivity menüingdak aser

yangji nungdakba study material ajak inoka lir, ta pai ashi.

Pai tesayur aser tsüraburtem dang pei tanurtem shisaliok magütsü malitsü atema külemi lungjemer inyakttsü ajangshia liasü.

Tesayurtemi iba ama tensa mejungi liaka bendanga agütsür meranga inyakba atema pelaba lemsatep aser tanü parnoki bendanga agütsüba nung asüing asoshi süngjang tajung atangtsü, ta ashi.

Iba virtual sentong nungya Mission Director Samagra Shiksha, Tamsunaro Aier, NCS menden liasü. Ajak senteper tablets 1,097 tekeratiba nung belenshitsü renema lir. Tablet nungya internet menüingdaker, kechiaser yangi syllabus nung aliba ama video lecture, MCQs, lesson rasaa ashiba, tasüingdanga aser telangzübatem renema inoka lir.

## NDPP ajanga asür W. Koratemjen Imsong mang ayimer

**Dimapur, Aami/June 04 (TYO):** 21-Tuli assembly constituency nung NDPP kimen, W. Koratemjen Imsong anojungi tanep (June 4, 2021) District Hospital Mokokchung nung asüba osang angashia aoksar aser kanga sasar, ta NDPP tir, Chingwang Konyak ajanga sangdong ka nung ashi.

adokogo aser pa asüba ya Tuli nung aliba nüburtem aser NDPP atema takoksa tulu alitsü, ta ashi.

Ni aser NDPP züngsem ajangai asükhü lemsatep aser mangyimer kibong nem tashi agüjang ta sarasademtsür. Asür tanüla teti tatem maka tesunep nung anisüingzükjangma, ta sangdong ajangasa ashi.

Pa asüba ajanga tawa tuluka



Guwahati nung COVID-19 atema curfew ozüng agüja aliba ajanga Inter-State Bus Terminus (ISBT) nung bus garitem anendena aliba angur. (Guwahati, June 4)

### CBSE curriculum nung Khasi aser Garo oshitem dendaktsütsü ayongzüker

**Shillong, June 4, 2021 (Agencies):** Meghalaya kübok Shillong nungi Lok Sabha MP Vincent Pala-i Central Board of Secondary Education (CBSE) dang Khasi o Garo oshitem second language options ama enoksemsü mepishiogo.

CBSE curriculum nung Khasi aser Garo enoksemsüla kechiyong Meghalaya nütsüng yongsük 78% ajanga item oshitem jembir, ta Vincent Pala-i Union Education Minister Ramesh Pokhriyal Nishank dang ashi.

"Meghalaya nung nütsüng yongsük lakh 35 shi lir aser iba

nungi 47% ajanga Khasi aser 30.86% ajanga Garo oshi jembir. CBSE Curriculum-i tawa adokba oshitem rongnung Khasi aser Garo dena mali saka nütsüng yongsük ishikati jembiba Mizo aser Tangkhul oshitembo dena lir. Mizo oshi ya nisung lakh 12 shi kati aser Tangkhul oshi ya nisung lakh 1.83 shi kati dang jembir" ta Pala-i Union Education Minister dang shidi nung ashi.

"Khasi aser Garo ya Meghalaya nung lisopurtemi jembiba mesüra züluba dang masü saka Northeast kübok Khasi aser Garo nung aliba

state tem nunga amshir. Bangladesh kübok nütsüng yongsük nungi shilem katia Khasi aser Garo oshitem jembir" ta paisa metetdaksü.

"Meghalaya nung CBSE den züngsema aliba school tem kangabo nüngtugu masü ta sayur ajisüaka tsüraburtemibo competitive examinations balala atema iba ya board tajungtiba ta meteta lir. Anungji ozü state nung tanurtemia education tajung angazüksü asoshi CBSE indang Approved languages nung Khasi o Garo dendaktsütsü ayongzüker" ta MP Pala-isa metetdaksü.

### Nalbari nung police-i shibelener 3 apu



**Nalbari, June 4, 2021 (Agencies):** Assam kübok Nalbari district nung police-i ozüng alema mozü aser nashi shibelener asem puogo.

"Nisung asem rongnung tongti süa aputsü bushiba Abu Bakkar Siddiqui dena lir" ta Assam Police DG - Bhaskar Jyoti Mahanta-i metetdaksü.

Hokolbarnü Nalbari Police Station aser Ghagrapar Police Station-i "thana-level" operation

ka tenzükba sülen par asem apu.

"Tanü Nalbari aser Ghagrapar thana temi sentong tajung atonga inyakba ajanga temelenshi bener aruogo. Tongti ketdangsürtemi ashiba matai OC aser Thana temi parnok sasa osang bendena mapa inyaktsü ni ajungmesoa arur" ta Assam DGP Bhaskar Jyoti Mahanta-i metetdaksü.

"Parnok sasa osang

metetpela, sentong atong aser ibaji mapa küma inyak. Iba ya nashi shibelener, mozü ayoker aser ozüng alema inyaker telok ka anema inyakba liasü" ta paisa ashi.

Police telok aser ozüng alea inyaker telok tsünga khatpeba sülen nisung asemji apu.

Iba mapang police-i nisung asem apu saka ano asem jena ao aser parnok aputsü bushitepdar.

"Iba telok mendanga atar aputsü merandang parnoki police dak injang khaloktsü. Iba jagi police-i parnok den meyiper khatepdang nisung asem yiru aser apu. Ano nisung asem aputsü bushitepdar" ta DGP Mahanta-isa ashi.

Police-isa SUV gari ka den pistol o injang ngutetogo.



Agartala nung frontline worker kati COVID nungi kümzüka aliba atema shishilembaba tesem ka mozü agi merüktetba angur. (Agartala, June 4)

**Piles Cure Centre** - Kabiraj dang alakteta pelaba metetdaksür. Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **H. Umar Chesam contact no.8416087414 / 7627998690** Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsünga ni taneptsü ngua liasü aser iba sülen tanü tashi kü temang nung timtem kecha mali. **Time: 7 AM - 3 PM - Yours sincerely -Luntsuba, Add: Tuensang town**



### Temang nung tashidak alirtem home quarantine masütsüla: Assam CM

**Guwahati, June 4, 2021 (Agencies):** Hokolbarnü Assam Chief Minister Himanta Biswa Sarma-i State Health Department dang temang nung tashidak alirtem dak COVID-19 putetra home quarantine facility masütsü atema tetuyuba agütsüogo.

Item shirangertemji institutional quarantine facilities nung anioksüla, ta Sarma-i Health Department ketdangsürtem dang ashi.

Tanü Guwahati nung aliba

Secretariat Building (Janata Bhawan) nung Health Department ketdangsürtem den senden amendang Assam CM Himanta Biswa Sarma-i iba tetuyuba agütsü.

Iba senden nung Assam Health Minister Keshab Mahanta aden.

"Covid menatepba aser nisung asüba azüoktsü atema temang nung timtem alirtem dak Covid putetra parnok institutional quarantine nung ayutsüla" ta Sarma-i ashi.

### Mizoram nung AR-i foreign cigarettes aika apu



**Aizawl, June 4, 2021 (Agencies):** Hokolbarnü 23 Sector Assam Rifles indang Serchhip battalion-i Mizoram nung foreign cigarettes aika puogo.

Osang tejangja angazükba nung ajemdaker Assam Rifles jawans aser Champhai Customs Preventive Force yaritepa Chhungte nung cigarettes apu.

Iba dak sendakba nung Customs Preventive Force-i nisung ka pua lir.

Tanü apuba cigarettes ji market nung Rs 11,70,000 shi alang lir ta osang ajanga ashi.

Assam Rifles-i Mizoram police aser tanga department tem den külemi ozüng alema mapa inyakerkem aputsü meranga arur.

Mizoram nung Indo-Myanmar international border arrtsü anasa shibelenba maparen kanga bulua inyaker.

Külem, Assam Rifles kübok Churachandpur battalion-ia Churachandpur district nung People's Liberation Army züngsem ka apu.

Osang tejangja ka angazükba sülen AR sepaitemi Valpakot yimtsüng mita aodang telungpurji apu.

### Manipur Congress-i Centre sorkar aitsür

**Imphal, June 4, 2021 (Agencies):** India nung senso shiai vaccine angati agitsü atema Centre-i anogo nung nisung crore ka nem vaccine agütsüba mapa tenzüktsü ta Manipur Congress-i Governor Najma Heptulla dangi shidi ka zülüogo.

"Modi'er sorkari Corona anema inyakba mapa anenogo aser nübortem meyarir. Centre nung BJP-i aniba sorkari COVID-19 inyakyim tim mesüi inyakogo" ta parnokisa ashi.

December 31, 2021 matongdangsa arishi küm 18 ser temapur ajak nem vaccine kabosa agütsütsüla. Iba ajanga

dang asen nübortem kümzüktsü, ta Manipur Congress-i Governor Heptulla dang ashi.

"Wara tiyalong nung asen sensosangertemi Corona menar saka Modi bo kanga mazüngi vaccine tangaleni yoker" ta parnokisa shidi nung ashi.

"Centre nung BJP sorkari vaccine alizüktsüla aser state o nija mozü kitem nem angati lema agütsütsüla. Iba ya meintyara parnoki India aser sensotem atema mapa shitak meinyaker ta asütsü. COVID-19 ajanga India nung kibong shia nem takoksa aser tejashi bentsür aruogo" ta Manipur Congress-isa metetdaksü.



# TIR YIMYIM

## YIMOBILEM (EDITORIAL)

DIMAPUR

KÜPTOKNÜ

AAMI (JUNE) 05, 2021

### Putu mendeni tashi amshitsüla

**N**agaland nungbo state government maliyonga nübortem nungdak ajak inyaka otettsüsa mezüing Nagaland tenzükdang nungi yimtak putu menden nem tashi agüja lir. Tanü ni' yangi iba yimobilem nung "putu menden" ta amshiba ya "Village Council" ta angatetdaksüner. Atangji, tanga kinbo akhi tsürabur mapang nungi putu menden alangteta yimsü süa marunungji, Village Council ta asüba nung kecha ratatsü mali, aji yimtak yimsüsür tatar putu menden dang ajar. Ajisüaka, asenok Aortem asoshibo putu menden o village council na tsüingda ya benteta angatettsü nungdaker, kechiyong ibai Ao nungi English agi meyipba dang masü saka putu atsüingba nungi tenzüka yimtak yimsüsübaren nung inyakyim balala asütsüsa adoker. Aji oda, kodang putu menden ta südir, iba putu menden nung tatartemjibo state government-i shimba masü, yimtak pei kin kidongi shimba asütsü saka Village Council nung tatartemjiang government-i shimba yimsüsürtem lir. Ano, putu menden nung tatartemjibo yimsüsütsü asoshi küm semer atema alangba asütsüsa akok saka Village Council nung züingsemtemjibo state government-i küm pongo asoshi shimba purtem lir. Aji oda, putu menden nung tatartemi yimsüsübajibo akhi tsürabur mapang nungi bentshia aruba mulungzüing temzüing ozüing nung ajemdaker yimsü asür saka Village Council-i yimsü asübajibo "The Nagaland Village and Area Councils Act, 1978" ajanga tashi agütsüba nung ajemdaker yimsü asür. Atangji, yim ka nung putu menden aser village council nung yimsüsür tatartemji nisungbo ka dang asütsü akok, saka yimsüsürtemi putu menden inyakyim o village council inyakyim naji bendang-bendanga yur, ana tsüingdaji mangatettep madoktsüsa yimsü asür. Iba amaji tangatettep nung, putu menden yimsüsürtembo akhi tsürabur mapang nungi bentshia aruba ama yimtak pei kidong saru molok (annual tax) aser senchimenchi agitsüba dak alaka government nungi aruba senotsü nung tangshitsü makoker, itemjibo government-i shimba Village Council purtemi dang amshitsü. Aji oda, government-i village council-bo anentsütsü akok saka putu mendenbo manendaktsütettsü, ibajibo pei yim aser pei kidong dak dang tashi lir. Ajisüaka, tanü putu nungbo state government nungi tashi aser teyari magiang yimtak terenlok nungdak mapatem kecha meinyakter asünungji, lia lia putu menden dang nungibo Village Council-ang tashi taitba aser tongtibangba kümogo. Aji oda, iba yimobilem tetenzüklen ashiba amaji, Nagaland nungbo yimtsüing ajak nung MLA aser minister aliyonga aser maliyonga terenlok mapatem inyaka otettsüsa Nagaland state akümba mapanga, Naga nung sobaliba aser ali tzü dak aketba rongsen ajak madak Naga nungersa kibur asütsüsa India temzüing arla 371 A nung laletja lir. Ano, iba sülen "The Nagaland Village and Area Councils Act, 1978" laletba ajanga government nung MLA aser minister maliyonga yimtak yimtsüing nung Village Council-i government tashi aser rongsen amshia terenlok mapa inyaka aotsü tashi agüja lir. Iba denji ano tang amai alima nung tashidak tamajung pokteta nübortem tsübutepba mapang ama ya, village council-i tapet sentong aser ozüing yanglua nokdangtsü atema "The Nagaland Village and Area Councils Act, 1978" arla 13 nung, "Yimtak temenatpba tashidak wara agi atongdang council-i akok tashi nokdangba mapa inyaksü," ta tashi agüja lir. Iba tashiji amshia, tang alima wara tesashi agi asenok amokmerendang asenok kümzüksü asoshi yim süngküm shibanger amongbaji dang masü saka Putu mendeni pei yimtak aliba Dispensary, Primary Health Center aser pei yimtsüing anasa aliba Community Health Center aser District Hospital nung doctor aser nurse kwi alitsüla aser kechi osetsa akatsüla aser kechi mozüsa koba Health Mission-tem nungi angutsüla ta item ajakji kenshia Directorate aser Secretariat tashi nung oagi asüingdanga pei angutsüba shilem shitak bushitsüla. Nübortemi metettsüba kaji, pei yimtak akaba dispensary-ji dang masü saka pei yimtsüing anasa aliba mozü kitemjia pei atema lapoktsüba ta bilema kanga nendaka anepalutsüla. Center nungi Health Mission ajanga angati mozü angutsüsa yoker ser nung asenokbo betadine aser bandage tashi asen ser agi alitsüsa akümbaji, kari iba senji chiogo ta bilemdi aser mozü kidang Specialist doctor alitsüba ser nung doctor mashi ka nem mozü ki ajanga nungloka toktsübaji nübortem mezüingmeshiba mapa ta bilemdi. Tang amai asenok yim among süngkümba shibanga ayu saka mozü kibo tazüing ta mongtepba kija jagi asenok meküzmzüksü. Tang ya mapang kasa nung külemi inyaksüla mapa ana rongnung kaji, tashidak memenatsüsa kümdanga alitsüla aser kaji shirangadok nunga ana nung angati taneptsü angutsüsa government mozü ki ajak shitak renema alitsüla.

# OLEMSABANG

## OH CORONA

~ Mrs. P. Atula Jamir, Aoyimkum, Dimapur

Oh Corona, na ya shiba-a ka?  
Na kong nungi poktet, shir chir?  
Ali pokli nungi ne tenüing mangashi.  
'Corona' ta angashidang, akümlir süjia aor.

Corona, na ozü nüki ngulasang, jungjunga sayangtsüla  
Oh Ne tsüingdangbo anüinglaki aturia mejemputeter.  
Ne tashi ya padaka ya asü no ta alimai mangmangteper.  
Alima chubai ne tsüingdang menokdakteti laor.

Oh Corona, nai takar, sensaker majiteter,  
Alima ajunga temrepba samatsütsü, na poktet no?  
Alima nung tsüingdangpi akongba ya nai sayangtsü  
Hitler chuba ali asünunga paia kechi shitetla

Oh Alima nung kechi tsüingken padaka ya  
Corona ozüing ya yamai sashi no?  
Kinüingtsüi pei kinüingpu jak mangu ali nem agütsür  
Tsürapur aser chirnur tejak reprangteptsü memelar  
Kiyonger o kiyonger na tsübutepba ya shitak no?

Yohan 3:8 nung ashi medem mopung koloni onnüdir,  
Ilenji aon ama na aruba aonba mangur.  
Na ajanga süidang, meimchir azülar,  
Ne ozüing angashidang, tamarenertema ali-i alur.

Alima nung alir tanak, temesüing ajak  
Tzü tatsük marok amer anü ludaktsür  
Na shibai temerenshi padaka ya sayangtsü-  
Ne tashi aser mapa ya kong nungi tenzük?

Nisung o nisung na temeim mekongtsü nai sayu,  
Nai sayuba mapa ya alimai metizüker  
Nai yirutsüba zübu ya anebtsü kanga tasak  
Oh ojang sangma, alima dang aochiangma no.

Oh Kibuba, ali takong aser tzüyim yanglusan  
Wara madak na kibur, yimra mopunga nai metet.  
Nai memelai-ang kujang kata tsüktsü makok.  
Oh Kibuba, Corona ajanga alimai Na akümtsübur.

Oh Temeranger tulusang, kotaker Tsüingrem,  
Kotak nungi nai ozüing ka yokangma no.  
Nai yangluba ne chirtem makaka ni.  
Nai renema akaba temerenshi rongnung ya ka asü?

Corona indang shisadang tekolok raksar,  
Saka Corona ajanga Yisu ajurutsü apu latsür.  
Corona, nai meimchir taochi makai samatsür,  
Saka onok tanela kümzüksü lenmang nguogo.

"Kü nübur shirnok kü tenüing agi ja-a lir,  
Parnoki ajemaludi süra aser sarasademra,  
Aser kü jak bushira, parnok lenmang tamajung nungi meyipra,  
Idangji ni kotak nungi angashitsü,  
Aser parnok temenen atoktsü, aser parnok lima anebtsütsü". 2 Putipuyang 7:14

### Covid 19 Vaccine atema ku tangatetba kar Lemsateper

~ Aienla Ao

2020 küm Covid vaccine mongutetba agi nuburtem kanga shisabuluteba aser tsübuseta liogo, tatem nung nubur ajaki asen Tsüingrem dang Covid vaccine ngudakjang ta Sarasademogo, atangji Tsüingremi asen sarasadem langzua 2021 Covid vaccine adoka nubur ajak temolungjang anisungzüka agia arudagi, Tsüingrem nem tenungsang peria agutsütsü melena, vaccine agiba ya majung, ta Olulu tapu adoka jembir, Hai! Nuburtem teyazü Olulu prokshiba yabo whatsapp nung anguyonga, aseni angubaji tatem sudi, meporokshili.

Tatalokba ka yamai. Kibong ka nung jabaso ka tebok kanga mejungi ao, aonung tetzü dang Oja, teboki aodang achiba mozü lira ka kwama ta meshi, tetzü jagi tsükden dak melepdaka ayuba mozü to agizüka agutsü, jabasoji aji chir tajungba aküm. Anepdang chiyonger, alui aotsü apusodang, lai alu nung azüingtsü mapujang to bushi nung, teboki aodang achiba mozü to dang liasu, tetenzü, yasung to par jabaso mozüto masu, mapujang to achi, aser taneptsü angu.

Kechi mozü sudir suang, amanga chira taneptsü angutsü, Tsüingrem dak amangdi, tenuk kuli asoshi mozüji nungdak, Saka taneptsür ji asen Tsüingrem, Anungji adianutem, koba Covid vaccine ngutetdaksüogo, asenoki amanga agidi, Olulu prokshiba nungi jenbua lidi, aser Tsüingrem nem tenungsang talubosa agutsüdi, yakta iba wara asenok nungi suidemsü, maneni sarasademdi.

2. Putipuyang: 7.14. Ku nubur shirnok kü tenüing agi jaa lir, parnok sasa ajemaludi sura, aser sarasademra, aser ku tejak bushira, aser parnok lemang tamajung nungi meyipra, idangji ni kodak nungi angashitsü, aser parnok temenen atoktsü, aser parnok lima anebtsütsü.

Tsüingremi asenok ajak moajangma.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

# Pakistan nung Khristan apuani na anema tasüba temerenshi agien



Pakistan nung Khristan apuani- Shagufta Kausar (abelen), la kinüngbu Shafqat Emmanuel aser tena chirtem noksa nung angur.

**Aami/June 04, 2021:** Pakistan linük nung Khristan apuani kati Tsüngrem mezüngmeshiogo, ta aitsüba ken o nung tena nem tasüba temerenshi obendang agütsür liasü, ajisüaka Brihostibarnü Pakistan nung aliba court kati apuani na iba ken o nung maitsüi tepuokdak nungi chioktsü obendang agütsüogo.

Iba ken o dak sendakba nung hopta ishika tejaklen European Parliament-i Pakistan linük nung ketdangsertem aitsür liasü.

Shafqat Emmanuel aser pa kinüngtsü, Shagufta Kausar nati Islam nung ainkar Mohammed mezüngmeshiba text message yok, ta tena nem tai tongloksüba sülen 2014 küm nungi tena tepuokdak yua liasü.

Osangbener den jembidang Khristan apuani na indang lawyer, Saif ul Malook aser prosecutor, Chaudhry Ghulam Mustafa nati, apuani nati temepishiba ken o ka agütsüba sülen court-i tena maitsüi chioktsü obendang agütsüogo, ta metetdaksü.

"Tena chioktsü obendang agütsüba atema ni kanga pelar, kechiyong asen linük nung teyari mangur aika rongnung tena densema lir," ta Malook-i metetdaksü.

Pakistan nung Islam yimsü anema inyakertem mesüra m e z ü n g m e s h i r t e m Blasphemy ozüng kübok aitsür aser aiben tasüba temerenshi obendang agütsür.

Dokan amener kati, Kausar aser Emmanuel nati phone ajanga pa dangi Tsüngrem mezüngmeshiba text message yok, ta tai tonglokja liasü.

Taküm April ita nung European Parliament-i vote ajanga Pakistan nung ketdangsertemi Ahmadis, Shiites, Hindu, Khristan aser Sikh nung densema minorities mekümzükteter, ta aija liasü.

European Parliament-i, "2020 küm nungi tenzüka sorkari Tsüngrem mezüngmeshiba ken o sashia benokba ajanga Pakistan nung tensa tamajungba akümer aser ketdangsertemi nütsüng ajema aliba tamangba yimsütem

mekümzükteter," ta bangzüng renema liasü.

Talisa Kausar aser Emmanuel na anema benokba ken o ya tebilemtsü tuluka lir, ta shia EU-i Pakistan nung ketdangsertem dang Khristan apuani na anema tasüba temerenshi agientsüla, ta mepishia liasü.

Apuani na ya Lahore kübok Gojra jila nungi lir aser iba jila nung minorities anema inyakba kanga bulua ataloker.

2009 küm nunga iba jila nung Muslim nung lokti kati Khristanem aliba kiyong ka amakba mapang nung ki 77 rongdoktsü aser nisung tenet tepseta liasü.

Meimchir temden atema inyakba telok- Amnesty International-ia, iba obendang ajanga linük nung Tsüngrem mezüngmeshiba ken o agientsü nungdak ta kuli sayur, ta metetdaksü.

"Kedangsertemi Shafqat aser Shagufta na den tena atema ken o jembitsür, lawyer Saiful Malook nem security agütsütsüla," ta Amnesty International-i takhangba agütsü.

# Iraq nung Khristan yim ka bomb agi amakba USCIRF-i aitsür

**June 04, 2021:** Mongolbar (May 25) anepdang yakta Iraq nung Kurdistan region kübok Miska yimdak Turkey nungi yokba rocket bomb apokba ola agi Khristanem kanga aoksatepa saak.

Rocket bomb ajanga Tenla ki ka densema ki aika poksaba sülen United States Commission on International Religious Freedom (USCIRF)-i iba tatalokba sashia aitsüogo.

USCIRF Commissioner, Nadine Maenza-i Turkey sorkari bomb amshia amakba atema aitsüba den külemi

Turkey sepaitem dang Kurdistan region nung rara nung shilem magirtem nem timtem agütsüba anenang, ta metetdaksü.

Mapang shia Turkey nungeri bomb amshia amakba ajanga Kurdistan region nung alirtem kanga takoksa angur. Miska yim nungi kilometer ana shi dang pilar aliba yim ana nungbo yimdaklir ajaki yim toktsür jenshiogo.

Tang Miska nung Khristan kibong 8 dang liasü saka May 25 nü bomb amshia amakba ajanga parnokia yim toktsür ajentsüa akok.

Turkey sorkar aser Kurdistan Worker's Party (PKK) tsüngda rara mapang nung Turkey-i Iraq arrtsülen mapang shia bomb amshia amaker.

Küm 30 tejaklen Turkey aser PKK na tsüngda rara tenzüka liasü, ajisüaka tesüiba küm ishika telok ana tsüngda rara tamajungba küma Kurdistan region kübok yimdaklirtemi yim aika toktsür jenshiogo. Kurdistan region nung yim 504 tashi azüngtetogo aser item yim rongnung Assyria Khristanem yim 150 shi densema lir.

# ANOGO ABEN TSÜNGREM DEN

## Jungtepshia liang

Tenladak madak ne tenla tokjang aser oang, aser tamasa ne adianu den jungtepang, ajiser arung aser ne tenla agüjang. Mathi 5:23,24.

Ne adianutem den tsükchitepa yur tenla agütsüba tagizüktettsü tenla masü. Yisui Pa sülen anidakertem dang kar anema langka ta lira parnok den jungtepang ta ashi. Alima telemtetba ka yur jungteptsü bushir Khristanemi kechi südir süaka jungteptsüla.

Nenoki ashir, "Saka nenoki ashir pai ni koda yirutsü nai memetet! Onok tesendaktep jungshiteptsü kuli maka." Mesüra, "Ni merangogo saka lai au masü." Jungtepba alitsü asoshi Yisui talila o meinoki. Ne tsükchir dang meimang ta dang Yisui ashi (Matt. 5:44). Pai na rishikangshira pa dang meimang. Pa atema sarasademjang ta dang ashi (Matt. 44). Yimjak nung na mak südaktsüra nai meyipa telangzü (t. 39). Kari ne dang langka meshira talila agüjang (t.41). Alimai sayur "Na atema liang." Yisui sayu, "Ne sasa tila kümang."

Na ajemzüksütsü ta alimai tekümdangtsü agütsür. Yisui Pa nütsüngtem dang junga beshitsüla ta mebilem saka parnoki ajak den jungtepa alitsü bilemtsü. Nisungi pa dak metsü metsüloktsü aser kangki nung angenlok. Pai kechi langzü aji asenok yimya (model) lir: "Oba, parnok dang tai tokang, kechiaser parnoki kechi inyaker aji parnoki memetet (Luke 23:34).

Idakji maneni ozüng raksaba lira aser tashi mangaba lira, ibaji jungteptsüla. "Ni mapatem shidak inyaktsü meranger, saka kü tsükchirtemi magizüker" ta asen sasa bilema asenoki tiplama alir. Tsüngrem Oi "Jungtepba alitsü merangang" ta mashir saka, "Jungtepang" ta ashir. Kar den na yimjung nungdaka lir asü? Süra Tsüngrem ashiba ama inyakang.

# US Intl. Religious Freedom Report ajanga India tenüng menüker

**June 04, 2021:** Tawa United States Department of State-i religious freedom report metetdaksüogo, aser iba report nung India nung religious freedom jenjang tamajungba akümba indang shia lir.

Tesüiba küm ishika United States Commission on International Religious Freedom (USIRF)-i India linük ya Country of Particular Concern (CPC) nung züngoktsü atema US State Department matsüngdang benoka arur, ajisüaka magizüker.

USCIRF aser Department of State report ji India nung watchdogs, advocates aser meimchir temeden atema inyakba organization aikati pelaa agizükogo.

Iba report ya taoba ita sangdong, aser iba report nung Narendra Modi yimsüsüba kübok India nung nisung bendanga züngshiba, reshikangshiba aser religious minorities anema inyakba metetdaksüba ajanga alima jenjang nung India tenüng menüker.

International Christian Concern (ICC)-i tesüiba küm ishika India nung Khristanem kanga timtemba indang sangdongba den külemi tanga partners-ia India nung Khristanem reshikangshiba osang bendena sangdonger.

Talisa India kübok state aika nung anti-conversion ozüngtem ajanga Hindu nung Khristan mesüra Islam yimsü dangi

memeyipteter mesüra item ozüng nung ajemdaker Khristan aser Muslim nung anema inyaker.

International Religious Freedom (IRF) Report nungji alima tesem balala nung tamangba yimsü temeden anema inyakba aser yimsü nung ajemdaker reshikangshiba osang metetdakja lir.

Iba report nung US State Department-i Saudi Arabia, Nigeria aser China linüktemi maneni nüburtem anema inyakba atema aitsüba den külemi United States-i maneni alima nung religious freedom atema inyaktsü, ta metetdakja lir.

US State Department-i India linük ya CPC nung mezüngsemyonga IRF report nungji India nung maneni Khristanem densema nütsüng ajema aliba yimsütem reshikangshiba indang shia lir.

IRF Report dak sendakba nung ICC nung Advocacy Director, Matias Perttula-i, "State Department indang 2020 IRF Report nung US-i maneni alima tesem ajungalen religious freedom ajungkettsütsü atema inyaktsü bangjembaji onoki (ICC) pelaa agizüker. Tanü linük aika nung reshikangshi lir, anungji religious freedom anema inyakertem anema teinyaktsü mapa jenti lir. Iba ama tongtibang onük ka nung ICC-i maneni State Department den senteper inyaktsü yongyaa atar," ta metetdaksü.

**OLONG PAITEP # 5834**


1		2				3		4		5
				6						
	7		8							
9					10			11	12	
			13			14	15			
16					17			18		
			19		20					
21		22								23
24										
							25			

- |                               |       |                             |       |
|-------------------------------|-------|-----------------------------|-------|
| <b>TIPIEN</b>                 |       | <b>LANGTSÜNGLEN</b>         |       |
| 1. Saku                       | - (4) | 1. Taksep                   | - (3) |
| 6. Songjen                    | - (7) | 2. Langtem                  | - (5) |
| 7. Mali/Tazung                | - (4) | 3. O tamendaktak            | - (4) |
| 9. Tasen apok                 | - (6) | 4. Nütsü tebuba             | - (3) |
| 11. Songtem                   | - (3) | 5. Anungdang tesangwa       | - (3) |
| 13. Ata liasü                 | - (5) | 6. Apitet                   | - (5) |
| 16. Tzünglu den külemi tsüker | - (3) | 7. Yagi jungdaksür          | - (4) |
| 17. Aso tila                  | - (6) | 8. Anogo semer ka           | - (3) |
| 20. Tashi maküm               | - (4) | 10. _____ tatsü             | - (3) |
| 24. Tenüng kasa jatepba       | - (7) | 12. Tebur kidong aser zünga | - (4) |
| 25. Ki yangluba oset          | - (4) | kasa tsungda jatepba        | - (4) |
|                               |       | 14. Pela agizükba tapu ka   | - (5) |
|                               |       | 15. Tenüng atet             | - (3) |
|                               |       | 18. Mejanga onü             | - (5) |
|                               |       | 19. Talak techira           | - (4) |
|                               |       | 21. Maneni                  | - (3) |
|                               |       | 22. Nübo teyi               | - (3) |
|                               |       | 23. Meshi                   | - (3) |

**OLONG PAITEP # 5833 TELANGZÜBA**

- |                                  |  |
|----------------------------------|--|
| <b>TIPIEN :</b>                  | <b>LANGTSÜNGLEN :</b>                    |
| 2. Anükalem, 4. Mesak, 5. Apet,  | 1. Kümdang, 2. Ayak, 3. Leptep,          |
| 9. Meimtep, 11. Posü, 12. Patak, | 6. Sati, 7. Yiar, 8. Sangküm, 9. Metsük, |
| 13. Tekettsü.                    | 10. Mazü.                                |

**Noksa nung meputepi aliba 10 bushiang**



**TANÜBO NAI LANGZÜANG**

Q. Central Bureau of Investigation ya \_\_\_\_\_ kübok aiter.  
 A. Ministry of Home Affairs  
 B. Ministry of Personnel and Training  
 C. Ministry of Women and Child Development  
 D. Ministry of Law  
 \_\_\_\_\_ (Taruba adok nung onoki langzüsü)  
**YASHI ADOK TELANGZÜBA : IFFCO**

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Jenti**  
 (adj) aika (many)  
 \* Tenla kidang nisung jenti sentep.

**Jentok**  
 (v) lokti nungi agien ( excommunicate)  
 \* Kibalembu nung aibelenertem kidong nungi jentok.



Tir Yimyim

**NAI-A YA METETTER MA?**



Turkey indang 'Centauri Honey' ya alima nung ninang mojtüzü rongnung jenjang tasaktiba mojtüzü alitsü. Iba mojtüzü ya tziyim nungi (sea level) meter 2,500 shi pilar tenem lungpuk ka nung Caucasian ta ajaba ninang tapu kati yanglur aser iba mojtüzü jenjang seret nung dollar 11,000 lir. Tanga mojtüzü den medemdangra Centauri mojtüzü ya küm nung khen dang agir.

**SUDOKU # 5876**      **TELANGZÜBA # 5875**

3		5		4						8	6	1	5	7	3	2	4	9	
				9		5			8		3	9	2	8	4	6	5	7	1
				1		6			5		5	7	4	9	1	2	6	8	3
	1	9				8	3				6	4	5	7	9	1	3	2	8
								7			2	8	3	6	5	4	1	9	7
						3	5				7	1	9	3	2	8	4	6	5
		7		5	4						1	5	6	2	8	7	9	3	4
	2		3					9	1		9	2	8	4	3	5	7	1	6
						1		5	6		4	3	7	1	6	9	8	5	2

**OJANG LUTEP # 5420**

ARWIO	:	<input type="text"/>	<input type="text"/>	<input type="text"/>	<input type="text"/>				
EIP	:	<input type="text"/>	<input type="text"/>	<input type="text"/>	<input type="text"/>				
POETR	:	<input type="text"/>	<input type="text"/>	<input type="text"/>	<input type="text"/>				
NJUGA	:	<input type="text"/>	<input type="text"/>	<input type="text"/>	<input type="text"/>				
PÜDENNZAG	:	<input type="text"/>							
OAKS	:	<input type="text"/>	<input type="text"/>	<input type="text"/>	<input type="text"/>				
ORMI	:	<input type="text"/>	<input type="text"/>	<input type="text"/>	<input type="text"/>				
NNGU	:	<input type="text"/>	<input type="text"/>	<input type="text"/>	<input type="text"/>				
AMRE	:	<input type="text"/>	<input type="text"/>	<input type="text"/>	<input type="text"/>				
AAM	:	<input type="text"/>	<input type="text"/>	<input type="text"/>	<input type="text"/>				

**OJANG LUTEP TELANGZÜBA # 5419**

**ATSÜKSHISHIA ASÜ DANG NUNGIBO TEBURCHI**  
**KÜMER AJAKI NGUA ASÜ TAJUNGBA**

**TAN HOPTA ATEMA - KOMA SÜLA ?**

Q. Asenok Aotsür Aor kidang tangar nisung kilir mayu nunga koma süla ?



Bengaluru, June 04, 2021: 'World Environment Day' atongtsü anogo ka lia Hokolbarnü Bengaluru nung aliba Saphagiri Institute of Medical Science & Research Centre nung coronavirus tashidak agi shiranger anepalur Health worker temi süngdong atemba noksa nung angur.

### Coronavirus Wave tasembuba nung tanurtem mejungi kongshitsü

**New Delhi, Aami/June 04 (Agencies):** Tang India linük nung coronavirus wave tanabuba anema raraba mapang nung linük nung health mongintemi coronavirus wave tasembuba atema renema alitsü sangdongogo.

Health mongintemi, coronavirus wara tasembuba atema junga renema melira iba wara agi tanurtem kanga mejungi kongshitsü, ta metetdaksüogo.

Taküm küm tatemlen coronavirus wave tasembuba agi kongshitsüa akok, aser iba wara ajanga taintem dang nungibo tanurtem tamajungba kongshitsü, ta metetdaksü.

Interview ka nung Masina Hospital nung Consultant Paediatrician, Dr Amin Kaba-i, iba tashidak agi shiranger tanurtem dak iba tashidak temaitsü timba angur, iba denji külemi iba wara ajanga kibong nung tanur-tain ajak kongshir, ta

metetdaksü. Paise, covid nungi tanurtem kümzüka alitsü atema tangar anasa maotsüla, mask agitsüla aser sanitize asütsüla, iba tashidak keta alir tanurtem dak temaitsütem rongnung temang metaba, aketba, yimra atongba, tangu junga mesashitetba, tekolak menüba aser temang bezüba densema lir, ano karbo teboklang angor, tebok aoser aser saaktsür, ta metetdaksü.

Anogo ana-asek dak tema tanurtem dak item temaitsü lira mesüra kibong nung kar dak iba tashidak keta lira samples tendangtsüla, ta pai metetdaksü.

"Tanur ka anogo 4-5 tashi temang metara, junga mechiyungra, azüimesenba yimya repringtetra, ghonda 6 dak tema natzü menara aser tangu junga mesashitetra tekaraba nung hospital-i anir aotsüla," ta Dr Amin-i metetdaksü.

Tanur shirangra temperature

tendangtsüla aser pa/la temang touzük sasep nung ghonda 4-6 shia Paracetamol mozü chidaktsütsü akok, ta pai metetdaksü.

"Shiranger tanurtem atema Paracetamol dak alaka tanga mozü menügdak, ajisüaka shirang anepba nung yaritsü atema vitamin C, vitamin D aser Zinc agütsütsü akok, saka nüngdak makaba nung pei sasa mozü magütsütsüla," ta pai metetdaksü.

Tanurtem atema coronavirus vaccine dak sendakba nung pai, "Tanurtem nem vaccine agütsüba nung timtem ali-maliar metettsü atema anüolen linük kar nung study südar. Linük kar nungbo tanur nem vaccine agütsü tenzükogo, ajisüaka India nungbo tanur nem vaccine agütsütsü atema temelaba magütsü, saka taruba hopta ishika mesüra ita ishika tsüngda temelaba agütsütsüa akok," ta metetdaksü.

### India nung nisung lakh 1.32 dak Covid putet aser 2,713 asü

**New Delhi, June 04 (Agencies):** India nung ano nisung 1,32,364 dak coronavirus putet aser tesüiba ghonda 24 tsüngda iba tashidak agi nisung 2,713 süogo, ta Hokolbarnep Union Health Ministry-i metetdaksü.

Tang tashi nung India nung nisung ajak agi 2,85,74,350 dak coronavirus putetogo aser iba tashidak agi asür ajak agi 3,40,702 jungogo, ta health

ministry-i metetdaksü.

Tang linük nung coronavirus agi teshirangdakpur 16,35,993 dang kümogo; tesüiba anogo ti tashi linük nung iba tashidak agi shiranger lakh 2 den tajemba lir.

Tesüiba ghonda 24 tsüngda iba tashidak agi shiranger 2,07,071 anepogo aser ajak senteperbo crore 2.65 dak tema anepogo.

Brihostibarnü linük nung samples 20,75,428 tendanga

liasü aser tang tashi nungbo samples ajak agi 35,74,33,846 tendangogo.

Tang iba tashidak agi teshirangdakpur 16,35,993 lir aser ibaji coronavirus caseload nungi shilem 5.73 dang lir; linük nung iba tashidak agi shiranger shilem 93.08 (nisung 2,65,97,655) anepogo aser iba tashidak agi shiranger asüba shilem 1.19 lir, ta Health Ministry-isa metetdaksü.

### Nüngtugu nisung 187-i opposition dang Covid anema raratsü mepishi

**New Delhi, Aami/June 04 (Agencies):** India nung lenla balala nung nüngtugu nisung 187-i akümba telok kati Centre sorkar nem temepishiba shidi aika agütsüba sülen maneni parnoki opposition party tem dang, nenok leniba nung lokti tentetem den senteper linük nung coronavirus anema raratsüla, ta mepishia metetdaksü.

Iba telok nungi shidi nung sign asürtem rongnung shisashirtem- Aditya Mukherjee, Mridula Mukherjee, Romila Thapar aser Irfan Habib nunger; economists- Kaushik Basu, Prabhat Patnaik aser Jayati Ghosh nunger; lokti lenir Shantha Sinha, Harsh Mander aser Wilson Bezwada nunger densema lir.

Parnoki ashiba agi, iba wara ajanga loktiliba nung timtem tulu adokogo aser Centre sorkar tamakok nung ajemdaker joko taruba coronavirus wave atema opposition party temi mera agia inyakba den külemi renema alitsüla, ta metetdaksü.

May 12, 2021 nü opposition lenir 12-i Ato kilonser, Narendra Modi dangi züluba shidi pusema nüngtugu nisung 187-i akümba teloki, "(Opposition-i) Centre sorkar den amalitepa inyaktsü asüngdangyonga India sorkari

magizükba dang masü saka linük nung iba tensa akoktsü atema party ajak, state sorkar ajak, mongintem aser lokti tentet balala nungi züngsemtemi national task force ka tentettsü atema benokba-a magizükba atema onok aoksar," ta metetdaksü.

Parnokisa, "Centre sorkari constitutional khuret meinyaker ama onoki repringteter," ta metetdaksü.

May 12 nü Congress Tir, Sonia Gandhi aser West Bengal chief minister/Trinamool Congress tongti, Mamata Banerjee na densema opposition party 12 nungi lenirtemi shidi ka ajanga Ato kilonser nem takhangba onük 9 agüja liasü. Takhangba onük 9 rongnung Covid-19 vaccine angati agütsütsü aser Central Vista project anena atar iba sen ji oxygen aser vaccines aliba nung amshitsü mepishiba densema lir.

Opposition lenirtem rongnungsa taoba mapang Ato kilonser, HD Deve Gowda, Maharashtra Chief Minister, Uddhav Thackeray, Tamil Nadu Chief Minister, MK Stalin, Jharkhand Chief Minister Hemant Soren aser CPI M general secretary Sitaram Yechury nunger densema lir.



June 04, 2021 nü Bhopal nung aliba Gandhi Medical College kima junior doctor temi parnok nem itasen tujang ta takhangba agüja longkak aitba noksa nung angur.

### Mehul Choksi India-i anir arutsü atema meranga inyakdar: MEA

**New Delhi, Aami/June 04 (Agencies):** Ministry of External Affairs (MEA)-i, India linük toktsür jena aoertem ajak linüki anir arutsü atema India-i temelungtetba yur inyaker, yamaji bank tsütsü ochimashi ken o nung Mehul Choksi-a linüki anir arutsü atema akokba tashi meranga inyakdar, ta metetdaksü.

"Tang pa (Choksi) Dominica nung lir aser legal inyakyim kar tang teinyakdak. Pa India-i anir arutsü atema onoki maneni inyaktsü," ta osangbenertem senden ka nung MEA otongdar, Arindam Bagchi-i metetdaksü.

Choksi-i India toktsür jena aoba sülen Antigua nung jenok, ajisüaka tawa pa Dominica linük nung anguba sülen pa tang

ketdangsertem ket nung lir.

Osangbenertem senden nungsa, Palestine foreign minister, Riad Malki-i shidi ka ajanga India External Affairs Minister, S Jaishankar dang India-i Gaza nung rara dak sendakba nung UNHRC nung vote magütsüba atema longkak aittsü metetdaksüba dak sendakba nung tasingdangba ka langzudang MEA otongdari, India-i vote magütsütsü telemtetba agiba ya tang mezüng masü; tamalen-a India-i onük aika nung vote magütsüi aruogo, ta metetdaksü.

Riad Malki-isa, Palestine-i India dangi dang masü saka vote magütsüba linük ajak dangia kasa shidi zülüogo, ta metetdaksü.



New Delhi, June 04, 2021: Hokolbarnü Ato kilonser, Narendra Modi leniba nung video conferencing ajanga Council of Scientific and Industrial Research (CSIR) senden amendang tangokba noksa nung angur. Iba senden nung jembidang Modi-i India nung mapang shidak nung coronavirus vaccine yanglutetba atema scientist tem nem tenüngsang agüja liasü.

## ADF teloki DR Congo nung civilian 57 tepset: UN

**Geneva, Aami/June 04 (Agencies):** Allied Democratic Forces (ADF) telok nung züngsemtemi Democratic Republic of the Congo (DRC) anüdoklen displacement camp ka nung May 31 nü civilian 57 tepset, ta United Nations ajanga Hokulbarnü metetdaksü aser prangbong aser nok agi nisung tepsetba aija liasü.

UN indang refugee agency, UNHCR ajanga ashiba agi, 1990s tatemlen Uganda nungi meindokba ADF temi lendong agütsüba ajanga nisung 5,800 shi anüdoklen Ituri province nung aliba displacement camp ana nungi jena aotsüsa akum.

"May 31 nü ADF temi Boga aser Tchabi jila anasa displacement sites aser yimtsüngtem nung kasa mapang amakdang tanur tenet densema civilian 57 tepset - shirnok dak prangbong agi akha aser nok agi lepa liasü," ta UNHCR odongtar Babar Baloch-i Geneva nung osangbener dang ashi.

"Nisung aika yirutsü aser nisung 25 pua bener ao, aser parnok jenoka aliba tesem aser oset ayuba tesem 70 dak tema mi agi rongdoktsü," ta ashi.

"Boga jila kisüing nung tetsür, tanur aser tebur 31 tepset. Mangyimer kibong nung züngsemtemi UNHCR partner tem dang ashiba agi, par kinungertem parnok kidang takum arong," ta Baloch-i ashi.

"DRC anüdoklen telungpur teloktemi iba ama mapa tamajung inyaka atema UNHCR kanga jashir," ta pai ashi.

Civilian tem kumzüka ayutsü atema UNHCR ajanga

region nung security meshia lir, shirnok lendong ajuruba ajanga tesem balala nung aiben jenshia senzür.

Ali rongsen peria aliba DRC anüdoklen telungpur telok balala senzüba rongnung ADF ya tesashiba lir.

Iba telok ya akhi mapang Uganda nung liasü saka 1995 sülen DRC anüdoklen adenshia lir. ADF ya ISIL (ISIS) den sendaktepa lir, ta United States-i March ita sangdong.

Nisung meyririjang aika Boga nungi anasa aliba tesem balala nung parnoki agia aliba aben süoshi dak alaka kecha mapen jenoka lir, ta Baloch-i ashi.

Parnok ya aika makamaiter kibongtemi anioka lir, kar moabu nung mejanger aser tanüingbapur ya nisung talila aliba tekülem ki nung jenoka lir, ta pai ashi.

DRC nung nisung million pongu dak tema azüdokshi tetsübu agi sünger lir aser Ituri kisüing nunga nisung million 1.7 pei ki nungi jena ogo, ta UNHCR ajanga ashir.

2021 küm DRC atema senotsü teyari million \$204.8 bushiba nungi shilem 18 dang nguteta lir, ta agency ajanga ashir.

North Kivu aser Ituri province nung sorkar anemertemi azüdokshi tali agütsüba mechi yangji mitkartemi civilian sorkar melener ita ka lir ano yangji martial law anogo 15 atsülangtsü, ta DR Congo ajanga Bresthostibarnü sangdonga lir.

Azüdokshi tatem kati arudaktsütsü meranga May 6 nü sorkari state of siege sangdonga lir.



Reijen, Netherlands nung MH17 tayimtsü teraksa bendena tanaben yanglushir aliba obedanger aser okatsürtemi mita repringba noksa ka yangi angur. 2014 küm Malaysian Airlines tayimtsü MH17 ya Amsterdam nungi Kuala Lumpur-i aoba mapang Ukraine sorkar meyong sepai den raradang Russia nunger busemer telok kübok aliba litsü nungi missile ka khalokja iba tayimtsü ya khazüka yoka liasü. Iba tayimtsü nung mena alir ajunga (298) asü, aser parnok ya shilem asem sadanger shilem ana Netherlands senso liasü.

## Azerbaijan nung landmine apokdak osangbener aser ketdangsür asü

**Baku, Aami/June 04 (Agencies):** Azerbaijan nung Nagorno-Karabakh anüolen tsütsü Kalbajar region nung landmine ka apokdak Azerbaijan nunger osangbener ana aser ketdangsür ka asü, ta sangdong ka ajanga ashi.

Hokulbarn anepdang 11:00 ako (par mapang) meta anti-tank mine kati truck ka poksaba lendong nungya dangar nisung pezü yiru, ta Azerbaijan indang interior ministry aser office of the prosecutor general ajanga sangdong ka nung ashi.

Asür nisung asem ya iba tesem nung ketdangsür Arif Aliyev, state news agency nung osangbener Maharram Ibrahimov aser sorkar meyong AzTV station nung osangbener Siraj Abishov, ta jangjaogo.

Armenia aser Azerbaijan na tsüingta arrtsü nung mangatetep adoka aliba mapang iba lendong ya ajuru, shirnok taoba küm Nagorno-Karabakh region atema hopta trok rara liasü.

Azerbaijan foreign minister Jeyhun Bayramov-i sangdong

ka nung iba osang angashia kanga jashir ta ashi aser Armenia dang mine yua aliba map agütsütsü ashi.

Armenia-i iba amala map ya agütsütsü memolunger, ta Azerbaijan sorkari aiben tai tonglokja arur.

"Anogoshi parnoki maneni iba temepishiba memolunger, nisung takum aika lendongi yoker," ta Bayramov-i tweet asü. Kasaji Yeni Nesil (New Generation) Journalists Union tekolakba, Arif Aliyev-ia ashi, aser mine yua aliba tesem indang map ya osangbener nem agütsütsüla, ta ashi.

Taoba küm raraba sülen Azerbaijan nem tanaben meyiba agütsüba region tem rongnung Kalbajar ya ka lir.

Armenia sorkari international law nung aibelena inyaker, ta Azerbaijani Journalists Union tekolakba, Elchin Shikhly-i ashi.

Item mine ya Kalbajara nung tawa ang aremba lir. Iba tetetsü Armenia ya kiralongraba maparen nung shilem agir ta

sayur. Iba ken o nung alimai ola adoktsüla, ta Shikhly-i osangbener dang ashi.

Iba osang züluba mapang tashinung Armenia ketdangsüri lendong atalokba atema osang sangdonga meliasü.

Azerbaijan aser Armenia tsüingta ali agi raktepa küm aika rara arur. Arrtsülen Armenia sepaitemi injang khaloktsüba mapang sepai ka yiru, ta Azerbaijan-i hopta ka tejakdang shia liasü.

Kalibajar nung Azerbaijan-i Armenia sepai trok apuba sülen iba lendong ya atalok.

Armenia-i par sepaitem ya engineering mapa inyaka liasü ta ashir, aser Azerbaijan-i sepaitem ya itdangiterba aser dangar nem teraksa agütsüba telok nung shilem ka, ta ashir.

Linük ana tsüingta raraba mapang anatsülen nisung 6,000 dak tema asü aser Armenia nung yimtenren tsütsü teraksa adoka Ato Kilonser Nikol Pashinyan kanga mejungi aitsü aser pai tamakok anguba ama aikati züingshi.

## France-i Mali sepai den lungjemer army operation agiba anena atar

**Bamako, Aami/June 04 (Agencies):** Taoba hopta Mali nung mitkartemi sorkar atsüingdokba tejashi nung France-i Mali sepaitem den lungjemer operation agiba anena atar, ta sangdongogo.

Cabinet melentepba nung mangatetep adokba mechi Mali sepaitemi May 25 nü khen atema Tir inyaka alisang Bah Ndaw aser Ato Kilonser Moctar Ouane apu aser parnok tashi agienja, taoba küm August ita mitkartemi sorkar atsüingdokba linük nung tarutsü nükla tejangja ka monguteti akum.

Anaben sorkar atsüingdokba lenir colonel Assimi Goita, shiba September ita tentetba transitional administration nung Ndaw indang deputy liasü, pa ya May 28 nü tir shimtet.

Mitkartemi tang tesüsa tashi rakzüka mechi Economic Community of West African States (ECOWAS) regional

bloc aser African Union ajanga par telok nung Mali züngsem agienja lira ser tenokdangba tesashi agütsütsü amokmeren.

"Mali nung yimtenren melenshitsu asoshi framework tejangja agüjang ta ECOWAS aser African Union ajanga metetdaksüogo. Tekeraba nung telangzüba agütsütsü atema Mali ketdangsür dak keta lir," ta France indang armed forces ministry ajanga Bresthostibarnü sangdong ka nung ashi.

"Item maparen nung tenangzüka ka magütsü aliba ajanga France-i külem pur aser Mali ketdangsür nem osang agütsüba sülen timtem nungi jenbutsu aser khen atema Mali sepai den lungjemer military operation agiba aser parnok ajangzüka national advisory mission tem khen atema anena atatsü lemetet."

Iba region nung taoba mapang France-i yimsü süa

liasü, aser yangji Operation Barkhane kübok parnoki sepai 5,100 shi Sahel nung yoka lir, kong linük pongu - Burkina Faso, Chad, Mali, Mauritania aser Niger lir.

Iba mission indang headquarter ya Chad nung lir, koba telungpur temi Mali tesem kar agir aliba atsüingdokba maparen nung France-i 2013 küm shilem agiba sülen amenoka liasü.

France sepaitem linük nung maneni temeja operation agitsü aser anogo ishika tsüingta telemtetba asadangtsü, ta ministry ajanga ashi.

France-i iba osang sangdongba ya Mali nung mitkar yimsüsür aser linük north aser central nung telungpur den raraba sepaitem asoshi takoksa tulu lir, ta osangbener kati Mali yimtiba, Bamako nungi ashi.

"France ya parnok asoshi külem pur tongtipang ka lir.

Mitkar amalitep anenba kisüing masü saka instructor aser training agütsür noklang aika Mali sepaitem den külemi aliba tangbo par den amalitep mali kumogo," ta pai ashi.

Mitkartemi sorkar atsüingdokba sülen "radical Islamism" tsütsü teshisadang makai mera agira France-i Mali nungi par sepai anizüker aotsü, ta Tir Emmanuel Macron-i hopta tatemlen amokmerena liasü.

"Ozü sepai oa yur Mali nung radical Islamism kodanga meinyakdaksütsü," ta Macron-i ashi.

Mali indang transitional president ka ama Hombarnü tenangzüktep agitsü alisang Goita ya taoba küm August ita mitkar anir sorkar atsüingdokba sülen tatong tir ka ama inyaka arur.

Ochimashi mapa inyaka ta angateta ita aika longkak aita aruba mapang aser sorkari

linük nung azüdokshi tamjungba akumba mazüoktetba mechi mitkartemi Tir Ibrahim Boubacar Keita atsüingdoka liasü.

ECOWAS nungi ajungshiba sülen transitional tir aser ato kilonser mapa ya civilian nem agütsü aser 2022 küm February ita election agitsü sentong liasü.

ECOWAS ajanga züngsem nungi Mali anenja atama ama African Union-ia Bodhbarnü inyaka aser mitkar dang tekeratiba nung talenba kecha makai parnok alidaki (barracks) meyipa aotsü ashi aser tarutsü nung Mali yimtenren nung shilem magitsü shia liasü.

Deobarnü ajungben senden ka amenba sülen ECOWAS ajanga sangdong ka nung tekeratiba nung civilian ato kilonser tasen ka shimtsü aser ajaki shilem agia sorkar tentettsü atema takhangba agüja liasü.



Changtongya, Aami/June 04, 2021: Hokolbarnü, Community Health Center Changtongya nung Maj. Sushil Gill Mokokchung Bn Tuli COB-i metsümeshidak (toilet block) tasen ka semzüksüba yangi noksa nung angur. Iba toilet block tasen ya I.G Assam Rifles (North)-i tenla agütsü aser Mokokchung Bn ajanga ARCAP 20-21 kübok yanglua liasü, ta sangdong ka ajanga metetdaksü.

### Mokokchung nung Ambulance Service tenzüksüogo

**Dimapur, Aami/June 04, 2021 (TYO):** Covid-19 dak sendakba maparen nung amshitsü atema, Mokokchung nung District Administration Mokokchung aser Mokokchung Police na longjemer 'Free Ambulance Service' ka tenzüksüogo, ta sangdong ajanga metetdaksü.

Mepaidoktetba rongdak mapang, manemertem pei kidang nungi COVID-19 hospital Mokokchung tashi anir aotsü atema iba Ambulance Service' yagi taa magii angati anepalutsü.

Iba den külemi, nungdakba purtem shirnok Covid-19 hospital/Covid Care Centre nungi pei kidangi aotsü molunger mesüra iba wara menatsü lendongbang tesem

nung alirtem Testing Centre tashi aotsü atema iba Ambulance Service' agütsütsü.

Nodal Officer aser SDO (Civil) Mokokchung Sentilong Ozukum-i ashiba agi, Mokokchung nung Covid-19 agi timtemer aika kuma aoba asadangteter, kechiyong iba wara temaitsü agi shiranger aika pei pei kidang dang anepalur aser mozüki tashi gari nung aotsü asoshi matur. Iba den külemi, nisung aikati tetsübu ajanga mozüki mesüra testing centre tashi Covid-19 agi shirangertem anir aotsü memolungba ajanga timtem aika adoker.

Kidang kibong nung kar danga Covid-19 temaitsü agi shirangba metetra takaratiba nung COVID-19 Helpline

number nung tongteprateptsü mesüra medical teyari agitsüla, ta Mokokchung nung alir nübur dang pai mepishiogo.

Iba mapatong tsütsü teyari agütsüba aser iba Ambulance Service' nung inyaksü molungsoa nübu agutsütetba atema, SDO (Civil) Sentilong-i Mokokchung indang SP, Shri Vishal IPS aser Christian Crossroad Ministry Mokokchung nungi Mr. Moamongba naprongla nem tenüngsang agütsü.

Maneni, iba 'Free Ambulance Service' ya Mokokchung Municipal aser temeküt tesemtem atema dang lir aser iba Service atema Helpline Number ji 9362561926 alitsü, ta kasa sangdong ajanga metetdaksü.

### 'Dream Girl' nung shilem agila Rinku Singh Covid-19 agi asü



**Mumbai, Aami/June 04, 2021 (Agencies):** Actress Rinku Singh Nikumbh, shibai Bollywood actor Ayushmann Khurrana indang Dream Girl nung külemi shilem agi, la Covid-19 agi shirangba sülen iba akümlü nungi pilaogo.

Bollywoodlife sangdong ajanga angazükba agi, tesüiba ishika anogo nungi Rinku Covid-19 agi shiranga liasü aser la temang mejungi akümba ajanga ICU nung anepalu. Rinku'er adianu Chanda Singh Nikumbh-i la asüba osang jangjatsü.

'Hello Charlie' film nung Rinku-i Aadar Jain aser Jackie Shroff na den külemi tesüsa shilem agiba nguogo.

Chanda-i ashiba agi, May 25, 2021 nü Rinku dak Covid-19 positive putet aser kidang dang anepalua aru. Ajisüaka, la temang kanga mejungi akümba sülen, la mozüki anir ao aser ICU nung anepalua liasü.

lai Goa-i aotsü bilema liasü, saka Covid-19 wara nung kümzüka lidaktsünüba yong onoki la meyok. Ashiko, kidang la dak iba wara menaa alitsü akok," ta Chanda-i metetdaksü.

Film dak alaka, Rinku Singh-i nungtugu series talisa 'Chidiyaghar' aser 'Meri Haanikarak Biwi' nung tongti shilem agiogo. Taoba küm, Sony Entertainment Television indang medical drama - 'Dhadkan' atema Rinku anioka liasü.

India nung COVID-19 wara tanaben adokba ajanga film aser TV industry nung kanga mejungi kongshiogo. Kasa mapang nungtugu nisung aika dak iba tashidak puteba den külemi karbo iba wara mekokteti taküm samaogo.

### Asür Er. Alang Asü Khuret Lemsateper

Alima meimchir taküm ya soli süli lima nung alirsa süaka, ita anogo ishika tsüngda nung asür Er.Alang (Aonokpu) aser kinungtsü tenaprongla Tsüngremer yongsük nung züngsemtsü asoshi, iba topur tajung lima nungi teti asoshi anisüngzükdak limai jar ogo. Item osang angashia kanga dang aoksar aser temulung shiranger. Saka Tsüngremer sentong asü nung, Pa nem dang tenüngsang agütsür. Aji oda süaka, akümlirtemi par mapa tajung menungra bilemteter, item mapa tajungtem ajanga Yisu maru tashi Pa sentsüwangshidaktsütsü. Toktsür aoba jala jabaso aser adianutem asoshi Tsüngremer mulung sünep aser taochi agüjangma ta ozü SANGPANG ROGO Mangkolemba sarasadem. Tsüngremer anünga aliba pur ajak nem arishi aser anema aliba moajangma.

### MULUNGNEN O

Aso : 11-02-1943 - Asü : 10-05-2021

**"Kü dak nenok tesünep angutsü asoshi ni nenok dang itemi jembiogo. Alima nung ne-nok timtem tekangshi kar; saka tasü itang ni alima kokogo." Yohan 16:33**

Onoki teti meima aliba tsürabur asür **Nukshimenla** (Changki), meyimlaba mapang ajungben iba akümlü wadang rene-mer joko kodanga meshilangtsüba lima-i aoba mapang ozü shisabulu aser mangyim tia nung alidang, ana aser talang nungi kija, kibong, Arogo, Yimden aser Lokti shirnok-isa sarasadem, nebo aser rongsen ajanga yaritepogo; nenok ajak dang kanga pelaba lemsateper.



Tsüngremer maneni nenok mapa tajung moajangma.

**Temeim Kinungbu, Jalajabasotem, Semchirtem aser Kinungertem.**

### OFFICE OF THE UNGER IMSONGUNGER KIDONG TELONGJEM

DIMAPUR : NAGALAND

### KONANG TETUSHI AGÜTSÜR

Dimapur Unger Imsongunger Kidongi **Wb. C. Lima Imsong** Sorkar mapa nung Joint Commissioner of State Taxes promotion ngua kidong aser Sensosanger nem konang nungsang tulu bener arutsüba asoshi pelar aser konang tetushi agütsür.




Tarutsü nung Tsüngremer nü wadang aser nür kibong ano maneni moajangma ta asen Imsongunger kidong züngsem ajaki sarasademtsür.

Sd/-

**SHILUMEREN IMSONG, (Secretary)**

### MULUNGNEN O




**Asoba: 1959**

**Asüba: 13.05.2021**

Onoki kodang amatoktsü makokba temeim obala Lt. **S. Bendangwati Tzudir** Molungkimong. Pa anogo ishika shiranga lir May 13.05.2021 anogo nung iba akümlü wadang toktsür ogo. Pa shiranga aliba anogo nungi tanü tashi shirnokisa rongsen den sarasadem nung yaritepogo nenok ajak dang kanga dang pelar. Asen teyanglur Tsüngremer nenok maneni moajangma.

**Temeim kinungtsü, chirnur, adianu, kinungertem aser anükapang.**

### Mulungnen O



**2.01.1919**

**26.05.2021**

**Asür A.Mejaba Longchar Ex. GB Chungtia Tir**

Onoki teti akümtsüba aser meima aliba arishir ozü tsürabur A.Mejaba Longchar, Chungtia Arogo nung mapangser nungi Deacon menden tashi inyaker, Goan Bura (GB), Ex. Serviceman den lokti balala nung küm aika tenzüka arur Tir menden nung küm 14 tashi inyaka lia arishi küm 102 nung Teyanglur dangi pelasete ogo. Pa shirang tenzüknü nungi tasünü tashi Chungita Medemchanger Putu yimsüsüri anir lokti balala, kija kibong ajaki sarasadem den rongsen nübu agi yaritepogo. Onoki kecha meyipa magütsütet nung ozü pela o iba sangdong ajanga nenok ajak den lemsateper. Tsüngremer nenok ajak moajangma.

**Temeim Chirnur, Semchisemnur, Kinunger aser Anükapang**

## Naseem aser Mohammad na Test squad nung denogo

**New Delhi, Aami/June 04, 2021 (Agencies):** August ita Pakistan cricket team pur West Indies nung Test series ana asayatsü atema, Hokolbarnü Pakistan selector temi fast bowler tasen Naseem Shah aser Mohammad Abbas naprongla squad nung anisemogo.

Taküm New Zealand tour nung Pakistan team pur 0-2 agi tsükba sülen, fast bowler anaprongla (Naseem aser Abbas) squad nungi agienadok aser Pakistan nunga South Africa aser Zimbabwe tour anaprongla nung tena masayadaksü.

Ano külen spinner Yasir Shah, Shiba temekok yiruba ajanga Zimbabwe Tests nung shilem magiteti aruogo, pa taneptsü junga mengutetba ajanga pai taruba tour nung shilem magitetsü ama asadangteter. Iba West Indies Tour atema selector temi leg-spinner Zahid Mahmood den külemi left-arm spinner Nauman Ali aser off-spinner Sajid Khan nung anisemogo.

"Taküm küm tetenzüklen, South Africa den tanabuba Test asayaba mapang, Yasir temekok yiruba ajanga pa squad nungi agiena liasü aser West Indies Tour atema pai tanaben team nung shilem agitsü imlaa

liasü," ta chief selector Mohammad Wasim-i ashi.

"Ajisüaka, bilemba ama matalok aser iba Tour atema team pur ayamesoa maodang pa iba timtem nungi taneptsü angutsü onoki imlaa atar," ta pai shisem.

Pakistan-isa parnok indang limited-overs squad tem sangdongogo, shirnok West Indies-i maodang taruba ita England nung ODIs asem aser Twenty20 match asem asayatsü sentong lir.

Saud Shakeel-a temang nung timtem aliba ajanga South Africa ODIs nung shilem magitetba sülen, squad nung tanaben pa aniokogo. Ano külen, Salman Ali Agha, shibai Test nung masayatet, taruba ODIs atema pa jaok.

Zimbabwe T20Is atema asayar talila ama dena aser South Africa tour nung junga asayaba sülen, Fakhar Zaman-a mezüing squad nung tanaben denogo.

PSL nung Quetta Gladiators indang arishi küm 22 tain batsman tajung Azam Khan-i T20I squad nung shilem agitsü maongka nguogo.

**\* Asaya telemsa balala atema Pakistan squad tem yamai alitsü:**

- ODI: Babar Azam

(captain), Shadab Khan, Abdullah Shafique, Faheem Ashraf, Fakhar Zaman, Haider Ali, Haris Rauf, Haris Sohail, Hasan Ali, Imam-ul-Haq, Mohammad Hasnain, Mohammad Nawaz, Mohammad Rizwan (wicketkeeper), Salman Ali Agha, Sarfaraz Ahmed (wicketkeeper), Saud Shakeel, Shaheen Afridi aser Usman Qadir

- T20: Babar Azam (captain), Shadab Khan, Arshad Iqbal, Azam Khan, Faheem Ashraf, Fakhar Zaman, Haider Ali, Haris Rauf, Hasan Ali, Imad Wasim, Mohammad Hafeez, Mohammad Hasnain, Mohammad Nawaz, Mohammad Rizwan (wicketkeeper), Mohammad Wasim Jr, Sarfaraz Ahmed, Shaheen Afridi, Sharjeel Khan aser Usman Qadir

- Test: Babar Azam (captain), Mohammad Rizwan (wicketkeeper), Abdullah Shafique, Abid Ali, Azhar Ali, Faheem Ashraf, Fawad Alam, Haris Rauf, Hasan Ali, Imran Butt, Nauman Ali, Sajid Khan, Sarfaraz Ahmed (wicketkeeper), Saud Shakeel, Shaheen Afridi, Shahnawaz Dahani, Yasir Shah (subject to fitness) aser Zahid Mahmood.

## French Open 2021: Zverev pezübuba round-i iogo

**Paris, Aami/June 04, 2021 (Agencies):** Hokolbarnü, French Open asayamung tebur kija tasembuba round asaya nung, World no. 6 Alexander Zverev-i Serbia nung Laslo Djere madak 6-2, 7-5, 6-2 agi koka pezübuba round tongogo.

Zverev, shibai Roland Garros asayamung atongtsü asoshi Madrid nung clay court title koka aser Rome asayamung quarter final nung Rafael Nadal-i tsükdaksü, Round pezübuba nung pai Japan nung Kei Nishikori den tokteptsü.

"Mezüing round ana dang nungi iba round nung kanga agi tajungba asayatsüla ta tejbibba ka aru. Asaya takok ngua aodang asayamung nung ano tajungba asayatsü teimla angur," ta Zverev-i ashi.

Tebur kija tanabuba round tetoktepta nung, Defending champion Rafael Nadal-i France nung Richard Gasquet tsükdakja tasembuba round tongogo. Terepranger medeni Philippe Chatrier stadium nung asayar ana tsüingda asayaba mapang, Brestostibar anogo arishi küm 35 ajungsang Nadal-i 6-0 7-5 6-2 agi Richard tsükdaksü.

Nadal, shibai Roland Garros nung 13 ben tashi takok ngua lir, pai Gasquet madak 17-0 agi takok angur alitsü. 2008 küm nungi asaya balala nung 12 ben tashi koka aruba mapang, Spain nung Nadal-i set ka nung danga tamakok ngudanga mali.

"Mezüing set nung ni junga

asaya ama bilemer, koba clay-court season nung asaya rongnung tajungtiba ka alitsü. Aibelen mesüi aser süngjem süngjema asayatetogo," ta Nadal-i ashi.

"Atangji nunga terepranger dena asayaba jisa tajungba, saka ajak dang tongtibangtiba ji temolung agüja asayabaji lir aser tanü bilemba ama jenjang balaka nung tennis asayatetogo," ta Roland Garros nung asaya 102buba takok anguba sülen, Nadal-i osangbener dang ashi.

Federer indang record ajangettsü atema, seed tasembuba Nadal-i 21buba tongtibang asayamung takok angutsü teimla nung shilem agidaki aser taruba Round nung pai Cameron Norrie den tokteptsü.

2019 küm French Open tebur final nung Dominic Thiem tsükdaksür külen nungi, iba asayamung nung Nadal-i set ka nung danga tamakok ngudanga mali. Kasa asayamung tetsür kija tanabuba round asaya nung defending champion Iga Swiatek-i 6-1 6-1 agi Sweden tsür Rebecca Peterson tsükdaksü.

Arishi küm 20 tain Iga-i minute 61 nung iba asaya koktet.

Iga Swiatek, shibai taoba küm October ita Roland Garros takok ngua liasü, Grand Slam singles title takok angur Poland tsür rongnung la mezüing kümogo.

Iba asaya set anaprongla nung Iga 5-0 agi Rebecca tejakdang ser asayaogo aser lai iba asaya amokbangba den azüoka asaya liasü.

"Iba asaya metenzükdang teinyaktsü tem nung anidakogo. Iba sülen court nung ajemoka asayaba mapang, ni aginüba ama ball dak züklorkja asaya. Iba yinya nung dang anidaka shilem agira, taruba nunga tajungba asayatsü ama bilemer. Tang, kü asaya yimyatem angudang pelar aser yamai dang asayatsü imlar," ta Swiatek-i ashi.

Kasa asayamung, tetsür kija tasembuba round asaya nung third seed Aryna Sabalenka-i 4-6 6-2 0-6 agi Russia tsür Anastasia Pavlyuchenkova makok.

Tetsür rongnung asayar tongti Ash Barty aser Naomi Osaka tukadokba sülen, tan hopta Paris nung Belarus tsür Aryna dak teimla tulu liasü.

Taoba mapang world no. 1 Victoria Azarenka-i America tsür Madison Keys madak 6-2 6-2 agi takok ngua pezübuba round-i iogo. 2013 küm nungi Azarenka-i French Open indang pezübuba round mezüing tongteter alitsü.

Belarus tsür Azarenka, shibai tesüiba küm 8 tejakdang Roland Garros semi-final tongteta liasü, taoba ita la terbrem nung timtem ajanga Madrid Open nungi tukadoker sülen, iba claycourt Grand Slam nung asayatsü arendaka liasü, saka lai iba asayamung nung tajungtiba shilem agiogo.

## OSANG : Tapak 1 nungi...

### Covid putetertemi mapang...

#### NOKLAK DISTRICT HOSPITAL:

Noklak nung District Hospital mali kechiyong district tasen lir. Ajisüaka, National Health Mission (NHM)-i Noklak nung District Hospital ka lapoktsü lemkütsüogo, ta Minister Pangnyu-i metetdaksü.

Tang Noklak nung yipden 30 aliba Community Health Centre ka lir aser iba ya NHM ajanga yipden 50 aliba District Hospital akümtsü, ta Principal Secretary HFW Bhatia-ia ashi.

#### VACCINE AGIRTEMA COVID-19 TEST ASÜTSÜ: COVID-19 vaccine agir

alirtem contact tracing kübok densemaka COVID-19 metendanger ta osang kar angazükba atema H&FW department ketdangsürtemi "parnok dak COVID-19 tendangtsüla" ta ashi.

#### PWDS NEM VACCINE AGÜTSÜTSÜ:

"Department-i district ajak nung persons with disabilities (PWDs) jangjatsü metetdaksüogo aser iba nung ajemdaker special sessions site mesüra near home covid-19 vaccination centre lapoktsü" ta State Immunization Officer, Dr Ritu Thurr-ia ashi.

### Medziphema nung Covid Care Center lapok

CHC Medziphema nungi CCC akümba ajanga nenoki mapa tajung inyakba sayur" ta Dimapur Deputy Commissioner, Rajesh Soundararajan IAS-ia ashi.

CCC Medziphema-i CHCs ajak ajateta maparen tembangogo aser DTF Dimapur-i akokba tashi yaritsü. Medziphema nung temolung agütsütsüla aser ADC Medziphema-i tebilemtsü khurettem lira lemsateptsü metetdaksür, ta paisa ashi.

DC Rajesh Soundararajan-isa Nodal officer Dimapur nem tenüngsang agütsü.

CHC Medziphema nung nungdakba infrastructure lir aser Medziphema nungi Dimapur lenmang talang asüba agi SMO Medziphema den jembiteper CCC akümtsü telemtetba agi, ta CMO Dimapur, Dr. I. Moatemjen-ia ashi.

"Tera shirangertem CCC Medziphema nung anepalutsü aser kanga shirangertem Covid

Hospital Dimapur-i anir oa anepalutsü. Nisung aika dak Covid puteta arurji nübo agi meperitsü akok saka nungdakba teyaritem agütsütsü" ta CMO Dimapur-isa metetdaksü.

"CCC Medziphema nung Covid agi shirangertem atema yipden 20 lir. Ajisüaka, Mother aser Child ward akhi ama lapoktsü. Maneni, onoki Army den OPD atema jembio" ta SMO, CHC Medziphema, Dr. N. Sezo-i ashi.

Dr Sezo-isa Medziphema nung alir John Bendang-i pa indang nija gari ajanga Covid aser non Covid shirangertem anir senzüba atema pelaba metetdaksü.

Sentong nung Health Management Committee Chairman aser NHHDC Ltd. Government of Nagaland, chairman Miathou Krose-i anküp tepela o jembia aser Ao Baptist Arogo Medziphema Pastor, Anungba Imsong-i CCC meshiteta sarasademtsü.

### Assam sorkari Covid-19 agi ...

Sorkar sen latettsüba nung dena aliba: registration charges, bed charges, boarding charges (food, etc.), nursing charges, consultant charges: RMO, MD, Anesthetists, Surgeon, Blood transfusions, oxygen charges, medicine & drugs as treatment protocol, pathology & radiology test charges dena lir.

Iba nungsa radiological imaging aser X-ray, USG, Haematology, Pathology, amala diagnostic test aser BMW (incl. Sanitization), PPE Kits, N-95 masks) dena lir.

Sorkari latettsüba jenjang nung C.T. Chest /HRCT Chest/ Di dimmer indang sen den Remdisivir/ Tocilizumab amala mozü densema mali.

Osangbenertemi Guwahati nung nija mozü kitem nung COVID-19 agi shirangertem dang nungi sen agiba bushitepa aodang anogo ka atema Rs 4500 nungi Rs 30,000 jungnüa agiba bushitet.

Guwahati nung nungtugu mozü ki kati anogo ka nung isolation cabin atema Rs 26,000 aser general ward Rs 22,000

agir. Iba nung medical charges maden aser ano COVID agi shirangertem nungi admission fee Rs 50,000 agir.

Ano, Guwahati nungsa super-speciality hospital ka nung Rs 10,500 agir. Iba mozü ki nungsa anogo ka nung ventilator medeni ICU nung amongba atema Rs 22,000 aser ventilator den ICU nung amongba atema Rs 24,500 agir.

Tanga mozü ki ka nung General COVID ward nung amonger dang nungi anogo ka nung Rs 4500, ICU nung amongertem dang Rs 12,000 aser deluxe room ka atema Rs 8500 agir.

Hokolbarnü Chief Minister Himanta Biswa Sarma-i Health Minister Keshab Mahanta den külemi ketdangsürtem den Assam nung COVID-19 maparen ketdangsüba meyipa reprangshia liasü.

Tanü amenba senden nung CM Sarma-i ketdangsürtem dang temang nung tashidak alirtem home quarantine masü saka institutional quarantine nung ayutsü atema tetuyuba agütsü.

## BILEMDANGANG

"Kechi jembidir abensaa bilemer jembiang."